

Visoki predstavnik će izvijestiti zvaničnike SAD o stanju u Bosni i Hercegovini

Visoki predstavnik Valentin Inzko danas, 13. maja, boravi u Washingtonu, gdje s visokim američkim zvaničnicima razgovara o situaciji u Bosni i Hercegovini, pred održavanje sastanka Vijeća za provedbu mira 21. i 22. maja u Sarajevu.

Visoki predstavnik će se sastati sa Hoytom Yeeom, zamjenikom pomoćnika državnog sekretara za evropske i evroazijske poslove, i senatorom Benom Cardinom, predsjedavajućim Komisije za sigurnost i saradnju u Evropi.

Tokom razgovora s američkim zvaničnicima, visoki predstavnik će naglasiti da se pogoršanje političke situacije u Bosni i Hercegovini nastavilo tokom posljednjih šest mjeseci. Također će upozoriti na značajan porast neprihvatljive secesionističke retorike, koji je bio primjetan u proteklom periodu.

Visoki predstavnik će razgovarati i o veoma zabrinjavajućem procesu politizacije pitanja prebivališta. On će pozdraviti činjenicu da je sadašnji predsjedavajući Predsjedništva BiH, Bakir Izetbegović, skorašnju odluku Vlade RS o prebivalištu uputio Ustavnom sudu Bosne i Hercegovine. "Traženje rješenja u domaćim instancama, pred Ustavnim sudom, predstavlja važan korak u rješavanju ovog pitanja u okviru Daytonskog mirovnog sporazuma", reći će visoki predstavnik.

Visoki predstavnik također će zahvaliti Sjedinjenim Američkim Državama za kontinuirani snažni angažman u Bosni i Hercegovini.

Nakon sastanaka u Washingtonu, visoki predstavnik će otputovati u New York, gdje će u četvrtak podnijeti polugodišnji izvještaj o provedbi mira u Bosni i Hercegovini

Vijeću sigurnosti UN.